

«Ina polizia datiers dals burgais»

Infurmaziuns davart la professiun da policista u da policist

■ **Policistas e policists cun certificat professiunal federal fan servetsch a favur dals umans e da la communitad. Ellas ed els èn responsabels da tut temp per la segirezza publica, per quietezza e per urden e procuran che las leschas vegnian observadas.** Sin sia pagina d'internet ed en diversas brochuras infurmescha la Polizia chantunala davart las premissas, ils champs da lavur e las sfidas da questa professiun tant pretensiusa sco fascinanta.

Ils policists èn activs en differents secturs. Els èn generalists da la polizia da regiuns ed èn sin viadi sco patruglia cun autos da polizia u cun motos. Ultra da far independentamain controllas, verifichegchan els oravant tut indicaziuns, avis e cloms d'agid ch'arivan da la populaziun. Els examineschan sco emprims la situaziun al lieu e prendan mesiras immediatas da protecziun e da salvament, arresteschan persunas suspectadas e segireschan fastizs.



Savens dattan els a persunas che tschertgan agid en situaziuns da conflict il sustegn necessari ed inizieschan las mesiras ch'èn necessarias. Els annunzian eveniments impurtants per func a la centrala. En cas d'in accident da traffic segireschan els il lieu da l'accident, erueschan l'andament da l'accident e procuran per l'ulteriura circulaziun dal traffic.

Tar la polizia criminala sclereschan policists crims sco per exempel delicts da proprietad e da facultad, spogliadas, blessuras corporalas, mazzaments e delicts cun narcotics. Els n'erueschan e na cumprovan betg mo ils delinquents, mabain distgargian er persunas innocentas. Cun meds auxiliars tecnicos ils pli moderns rendan els visibels schizunt fastizs minimalis. Impurtant èn però in bun nas, intuiziun, inschign psicologic e l'abilitad d'analisar fatgs en moda svelta e correcta. En tut las situaziuns ston els restar calms, nudar tut al lieu dal delict en moda objectiva e confirm a la vardad, re-



Policist(a) – ina professiun che pretenda bunas abilitads fisicas e mentalas.

PAUL-GEORG MEISTER / PIXELIO

tschertgar conscienziosamain ed interrogar perditgas. Els sustegnan las autoritads sin il champ operativ e cumparan en cas da basegn sco perditgas er davant dretgira.

Policists ston avair ina gronda cumpetenzza sociala, mussar in ferm caracter ed esser resistents cunter stress. Las dunnas adempleschan las medemas incumbensas sco ils collegas da lavur masculins.

Da la recrutaziun al certificat professiunal

Recrutaziun

La scolaziun teoretica ha lieu en la Scuola da polizia da la Svizra Orientala ad Amriswil (TG). Candidatas e candidats da lingua materna taliana han la pussaivladad d'absolver la Scuola da polizia en il chantun Tessin (Giubiasco). Ils praticums vegnan frequentads en il corp da la Polizia chantunala dal Grischun. Per pudair absolver la Scuola da polizia ston ins

ademplier las suandantas kundiziuns d'admissiun: Buna reputaziun; dretg da burgais svizzer; vegliadetgna tranter 20 e 35 onns; scolaziun professiunala terminada cun attest da qualificaziun federal u scolaziun equivalenta sco matura u diplom da scola commerciala; bunas premissas fisicas e psichicas; naginas proceduras penales currentas; grondezza minimala da 160 cm; permess da manischar da la categoria B; enconuschientschas dal computer; giavischadas vegnan enconuschientschas da linguas estras. Supplementarmain per candidatas e candidats da la Scuola da polizia dal Tessin: Bunas enconuschientschas dal tudestg a bucca.

Plinavant ston ins absolver cun success la suandanta procedura da recrutaziun: Test da qualificaziun che consista d'in test da sport e d'in test da teoria e d'abilitad; discurs da valitaziun; controlla tras il medi da confidenza; discurs da candidatura.

Scola da polizia

La scolaziun da policista u da policist dura in onn ed è sutdividida en differents blocs:

Set mais instrucziun teoretica (p.ex. accziun da la polizia, community policing, psicologia poliziala, etica professiunala e dretgs umans) en la Scuola da polizia da la Svizra Orientala ad Amriswil (TG).

Curs specialisads pratics (excursiuns d'in di, curs da la polizia da segirezza e sport).

Tschintg emnas scolaziun specifica dal corp (p.ex. teoria da rapport, lescha chantunala da polizia, disegnar accidents da traffic, POLYCOM).

Set emnas instrucziun pratica tar la Polizia chantunala dal Grischun cun invista da tut ils secturs dal servetsch da polizia (p.ex. polizia da regiuns, polizia da traffic, polizia criminala e logistica).

In mais repetiziun ed examens finals ad Amriswil.

Certificat professiunal

Tgi ch'absolva la scolaziun da basa necessaria e fa suenter cun success l'examen professiunal, survegn il certificat professiunal policista/policist che permetta da pratigar la professiun.

Il certificat professiunal ha ils suandants avantatgs: Renconuschientscha federala (cumparegliaziun cun autras furmaziuns professiunalas), conferma da las cumpetenzas da basa d'ina generalista u d'in generalist, la pussaivladad da lavurar sco policista u policist (en blers corps è quest certificat professiunal obligatoric), access a l'examen professiunal superiur.

«Agir svelto ed en moda bain ponderada»

Il 2008 ha la Polizia chantunala ed la brochura d'infurmaziun trilingua «Kantonspolizei Graubünden – Polizia chantunala dal Grischun – Polizia cantonale dei Grigioni». En quella vegn tematisà il profil professiunal ed approfondì ils singuls champs da lavur da las policistas e dals policists.

Ina professiun plain sfidas

Segirezza en il Grischun, per ils abitants, per ils giasts da vacanzas, per ils participants da congress sco er per passants, quietezza ed urden per tuts – per quai procuran las policistas ed ils policists chantunals. Da di e da notg, onn per onn, da tutt'aura, sin las vias dals pass e sin las autostradas, en la citad e sin la champagna, sin las muntognas e giu en las vals. Dapertut ed adina èn els pronti per porscher agid, per surpigliar accziuns da salvament e per far retschertgas. Adina stat l'uman en il center. Cun sia cumpetenzza specialisada e sociala sa drizza la polizia tenor ils basegns da las burgaisas e dals burgais. Policista chantunala, policist chantunala – ina professiun cun sfidas tranter blers champs da tensiun, in'incumbensa pretensiusa en il servetsch da nossa cuminanza.

Restar calms e tuttina agir svelto

La tensiun tranter agir en moda calma e bain ponderada ed intervegnir uschè svelto sco pussaivel ans accumpogna di per di. Ina buna soluziun il dretg mument è adina megla ch'ina soluziun perfetga che arriva memia tard. Realisar quest princip è tant ina sfida sco er ina finamira. Agir svelto ed en moda professiunala po salvar vidas. Las accziuns vegnan coordinadas en la centrala d'alarm e d'accziuns tras collavuratur cun experientscha.

Intervenziuns en l'auzezza ed en las vals, da di e da notg

La topografia extraordinaria da nossa chantun pretenda ina gronda abilitad da s'adattar. Ils eveniments determineschan ils lieus d'accziun. Che quai saja en la citad u sin la champagna, en il territori alpin u giu en il fund da la val, sin funs averts u en guauds mal accessibels ed en chavorgias stretgas – nus stuain esser preparads. Per mintga cas. Da di e da notg, da tutt'aura.

Sustegn d'animals e da la tecnica

Nus essan in corp da polizia modern cun in bun equipament che correspunda al temp dat oz. Per duvrar meds d'agid da tut gener, armas ed er chauns en moda proporziunala e cun success, basegni

exercizi. Quai pretenda blera lavur e blera pazienza. Perquai che las furmas da la criminalitad sa midan permanentamain, pervi da novas prescripziuns legalas, ma er pervi dal svilup da la tecnica, èsi necessari da sa scolar e da sa furmar vinavant regularmain.

Pront per l'accziun en tut ils elements

Nossas unitads specialisadas èn adina prontas da dar dumogn er a situaziuns extraordinarias che concernan la polizia da segirezza, p.ex. a chaschun d'occurrenz grondas u per proteger conferenzas e persunas periclitadas. Grenadiers, manaders da chauns commembers dal cader alpin, sfunsaders, manaders d'accziuns sgulants – che lavuran cun il helicopter sco med d'accziun da la polizia – sco er tiradurs da precisziun han absolvi scolaziuns specialas pretensiusas ed intensivass.

Tschertgar fastizs – eruir delinquents

Chattar la guglia en il fain è mintgatant pli simpel che tschertgar ils fastizs al lieu dal delict. Segirar ed evaluar fastizs èn incumbensas da la tecnica criminala. Cunzunt sias enconuschientschas gidan a sclerir ils acts chastiabels ed ad eruir ils delinquents. Quai pretenda savens lavur da detagl, pazienza e precisziun, e quai en cumbinaziun cun enconuschientschas scientificas e cun chapientscha tecnica.

Segirezza entras prevenziun

Prevegnir è meglier che guarir. Perquai organisain nus regularmain champagnas da prevenziun per preservar ils umans da disgrazias smanantschantas. Quai vala tant per ils fatgs da la polizia da traffic sco er per ils fatgs da la polizia criminala. Dapli segirezza en il traffic sin via gia tar ils uffants pitschens, per quai procuran noss instructurs da traffic. E noss post specialisà per la prevenziun porscha gratuitamain cussegliazziuns da segirezza independentas ed individualas per mintgina e per mintgin.

Teamwork e cumpetenzza sociala

L'uman stat adina en il center. Situaziuns d'urgenza, disgrazias ed accidents, culps dal destin u schizunt tragedias umanas ans scuntran savens. Per dumagnar tals eveniments dovri gronda cumpetenzza sociala – in tema ch'ha ina impurtanza centrala gia durant la Scuola da polizia e che sa tira pli tard sco in fil cotschen tras nossa vita professiunala. Partenadi er en il team, en in clima da lavur collegial – per la segirezza da nus tuts.

In sguard en l'istorgia

Avant il 1803 na disponiva il Grischun betg d'ina polizia statala organisada. Responsabels per l'orden public eran las vischnancas ed ils cumins, e mo la citad da Cuir aveva ina polizia ordinaria. Dapi il 1766 disponiva mintga Lia d'in uschenumna langedar u harschier che controllava ils vagants. Il 1804 è vegni furmà in corps da polizia cun in corporal e set policists, e dal 1813 datescha l'empirim reglament da servetsch detaglià (polizia criminala e polizia d'esters). La Polizia chantunala aveva ses domicil en il Karlihof vegl, alura en il nov sper la Chasa Grischa a Cuir e dapi il 1969 en in nov stabiliment a la Kasernenstrasse/Ringstrasse. Dapi il 1952 dispona ella d'ina polizia da traffic. La polizia criminala ed ils servetschs specialisads opereschan davent da Cuir. Il 1904 è vegnida fundada a Panaduz la Federaziun grischuna dals funcziunaris da polizia (iniziant ed emprim president è stà Christian Frigg).

La presentaziun:
Dossier «Polizia chantunala».

Dapli infurmaziuns:
chatta.ch/?hiid=1102
www.chatta.ch



Polizia da traffic e polizia criminala – duas da las partziuns centralas da la Polizia chantunala.

TIM RECKMANN E PAUL-GEORG MEISTER / PIXELIO